

- प्रधानमंत्री नरेन्द्र मोदी देश का विकास मांग **एम.एस.एम.ई.** का काम ने बदलाव लावण वाळो बतायो।
- केन्द्रीय मंत्री भूपेन्द्र यादव भारत की **सर्कुलर इकोनॉमी** साल 2050 ताई 2 ट्रिलियन डॉलर ने पार कर जावण की आस जतायी।
- प्रदेश मांग खाद्य सुरक्षा योजना का तैत 26 जनवरी ऊं हाल ताई करीब 9 लाख नुवा नाम जोड़ी ज्या।
- आईसीसी चैंपियंस ट्रॉफी क्रिकेट का सेमीफाइनल मुकाबला मांग ऑस्ट्रेलिया भारत सामी जीतण सारु 265 रन बणावण की चुनौती पेश कीनी।

000

प्रधानमंत्री नरेन्द्र मोदी कह्यो है के सरकार खुद रे पाण ऊबा भारत का नजरिया सागे काम कर रही है। वे एमएसएमई हलका का बारा मांग बजट पाछे वेबिनार मांग बोल रह्या हा। प्रधानमंत्री कह्यो के एमएसएमई देश का माली विकास मांग बदलाव रो काम करे है।

देश मांग कारोबार आसानी ऊं करण मांग सुबीतो बधवण सारु करी ज्या न्यारा-न्यारा जतन का बारा मांग श्री मोदी कह्यो के सरकार दूजा जनविश्वास बिल माथे काम कर रही है। वे कह्यो के बजट मांग मैनुफैक्चरिंग अर दिसावर मांग बिकी ने बधावो देवण सारु केई खास जतन करी ज्या है। श्री मोदी कह्यो के आखी दुनिया का देश भारत सागे मजबूत माली साझेदारी की मर्जी राखे है। प्रधानमंत्री कह्यो के उद्योगपतियां ने दुनिया की आपूर्ति श्रृंखला मांग मौकां की तलाश करणी चाहिजे। वे कह्यो के उत्पादन ऊं जुड़ी प्रोत्साहन योजना 13 लाख करोड़ रुपया मोल ऊं बत्ता उत्पादन सागे डोढ़ लाख करोड़ रुपया ऊं बत्तो निवेश आकर्षित कीनो है।

000

केन्द्रीय पर्यावरण, वन अर जलवायु परिवर्तन मंत्री भूपेन्द्र यादव आस जतायी है के भारत की सर्कुलर इकोनॉमी साल 2050 ताई 2 ट्रिलियन डॉलर ने पार कर सके है, जिण ऊं करीब 10 मिलियन नौकरियां पैदा व्हेवण का आसार है। वे जयपुर मांग चाल रह्या **एशिया और प्रशांत क्षेत्र मांग 12वां क्षेत्रीय थी आर अर सर्कुलर इकोनॉमी फोरम** का आज दूजा दिन का एक सत्र मांग बोल रह्या हा। और ब्यौरो म्हाणा खबरनवीस ऊं –

आवास अर शहरी विकास मंत्रालय का सचिव श्रीनिवास कटिकिथला खबरनवीसां सागे बातचीत करता थकां बतायो के बधता शहरां अर विकास सागे साधन काम लेवण मांग बधोतरी व्ही है, ज्यीं कारण ऊर्जा अर पाणी समेत दूजा साधनां ने ओजू काम लेवणो जरूरी व्हे ग्यो है। वे कह्यो के फोरम मांग शिरकत करण वाळा सहभागियां की सहमति ऊं **जयपुर डिक्लेरेशन** रो मजमून तैयार कर्यो जा रह्यो है।

000

उपराष्ट्रपति जगदीप धनखड़ रो काल झुंझुनूं का दौरा सारु पधारण रो कार्यक्रम है। वे जिला का सांगासी की महात्मा गांधी राजकीय स्कूल मांग बच्चां सागे बातचीत करेला। लोकसभा अध्यक्ष ओम बिरला रो ई काल वां का चुनाव क्षेत्र कोटा-बूंदी रो दौरा करण रो कार्यक्रम है। वे नागरिक सहकारी बैंक का नुवा भवन रो उद्घाटन करण सागे और केई कार्यक्रम मांग शिरकत करेला।

000

राज्य मांय खाद्य सुरक्षा योजना रो फायदो लेवण वाळां री फेहरिश्त मांय हाल तांई 8 लाख 91 हजार 400 ऊं बत्ता नुवा नाम जोड़ी ज्या है। खाद्य अर नागरिक आपूर्ति मंत्री सुमित गोदारा आज विधानसभा मांय आ जाणकारी दीनी। वे बतायो के 26 जनवरी ने खाद्य सुरक्षा पोर्टल खुल्यां पाछे नुवा नाम जोड़बा रो काम चाल रह्यो अर इण रो फायदो बत्ता ऊं बत्ता लोगां ने मुहैया करावण सारु ई-केवाईसी करावण री आखिरी तारीख बधा र 31 मार्च कर दीरीजी है। सदन मांय उपमुख्यमंत्री अर पर्यटन मंत्री दीया कुमारी सैलानियां ने जरूरी सुबीता मुहैया करावण सारु बेगो ई मोबाइल एप लॉच करण रो ऐलाण कीनो। वे कह्यो के ई री मदद ऊं सैलाणियां ने नजदीकी पुलिस थाणा, अस्पताल, सैर-सपाटा री ठोड़ां, आवण-जावण रा साधनां ऊं जुड़ी अर दूजी जरूरी जाणकारियां आसानी ऊं मिल सकेला। दीया कुमारी बतायो के जयपुर रा चौड़ा रास्ता मांय बणायी ज्या पर्यटक सुविधा केन्द्र ने चालू करण रो फैसलो बेगो ई लियो जावेला।

विधानसभा मांय आज मुख्यमंत्री भजनलाल शर्मा भारतीय जनता पार्टी रा विधायक दल री मीटिंग ने संबोधित कीना। वे सत्र रे दौरान सदस्यां ने सदन मांय पूरी तैयारी सागे बोलण बाबत् कह्यो। वे सदन री कार्यवाही बिना अड़चन रे चलावण सारु आपसी तालमेल बणा र काम करण बाबत् ई कह्यो।

000

देश मांय करीब दस लाख 40 हजार महिलावां पंचायती राज संस्थावां ऊं जुड़योड़ी है। केंद्रीय पंचायती राज मंत्री राजीव रंजन सिंह आज नई दिल्ली मांय व्हे रह्या चुणी ज्यी महिला प्रतिनिधियां रा राष्ट्रीय सम्मेलन मांय **सशक्त पंचायत-नेत्री** अभियान रा उद्घाटन जळसा मांय आ जाणकारी दीनी। वे कह्यो के सरकार महिलावांने मजबूत बणावण सारु लखपति दीदी अर नमो ड्रोन दीदी योजनावां चलावण समेत केई जतन कीना है।

कार्यक्रम मांय केंद्रीय महिला अर बाल विकास मंत्री अन्नपूर्णा देवी कह्यो के महिलावां री अगुवाई मांय विकास, समाज मांय सकारात्मक बदलाव सागे माली विकास लावे है। वे महिला प्रतिनिधियां ऊं चोखा काम रे ज़रिए वां रा गांवां सारु प्रेरणा बणबा री अरज कीनी। अंतर्राष्ट्रीय महिला दिवस रा सिलसिला मांय पंचायती राज मंत्रालय री ओर ऊं राख्यी ज्या ई कार्यक्रम मांय बारह सौ ऊं बत्ती चुण्यी ज्यी महिला प्रतिनिधि सिरकत कीनी। कार्यक्रम रे दौरान चुणी ज्यी 23 महिला प्रतिनिधियां ने वां री पंचायतां मांय करी ज्या बेहतरीन कामां सारु ईनाम दे र नवाजी ज्यी।

000

दुनिया मांय महिलावां रा हक, बराबरी अर मजबूती ने बधावो देवण रा मकसद ऊं हर साल 8 मार्च ने अंतर्राष्ट्रीय महिला दिवस मनायो जावे है। ई सिलसिला मांय प्रदेश मांय ई न्यारा-न्यारा कार्यक्रम राख्या जा रह्या है। जयपुर मांय आज मुख्य सचिव सुधांशु पंत **‘राजीविका रंगोत्सव’** री सरुआत कीनी। ई रा तैत स्वयं सहायता समूहां ऊं जुड़ी महिलावां कानी ऊं बणायी ज्या सामान रो दरसाव कर्यो जा रह्यो है। कोटपूतली-बहरोड़ मांय चाल रह्या महिला दिवस सप्ताह रा तैत आज बैंकिंग योजनावां री जाणकारी दीरीजी। पाली मांय कार्यशाला राख र महिलावां अर टाबरियां रा भला सारु चलाई जा रही न्यारी-न्यारी सरकारी योजनावां री जाणकारी दीरीजी।

000

राजस्थान माध्यमिक शिक्षा बोर्ड दसवीं अर बारहवीं कक्षा रा विद्यार्थियां री परीक्षा 6 मार्च ऊं लेवेला। मैट्रिक रा इम्तिहान 5 अप्रैल अर बारहवीं री परीक्षा 9 अप्रैल तांई चालेला। बोर्ड इम्तिहान सारु प्रवेश पत्र जारी कर दीना है। बोर्ड रा सचिव कैलाश चन्द्र शर्मा बतायो के ई दफा इम्तिहान देवण सारु करीब 20 लाख विद्यार्थी अर्जियां दीनी। इम्तिहान सारु बोर्ड 6 हजार 188 सेन्टर बणायो है।

000

बाड़मेर ज़िला रा धनाऊ हलका मांय ईटादा-अधरीम का तला गेला माथे मोटरसाइकिल अर अज्ञात गाड़ी री टक्कर रे कारण दो जणा री मौत व्हे ग्यी। मोटरसाइकिल सवार एक जणा री मौके ई मौत व्हे ग्यी, जदके दूजो धनाऊ अस्पताल मांय दम तोड़ दीनो।

000

आईसीसी चैंपियंस पुरुष क्रिकेट ट्रॉफी रा दुबई मांय खेल्या जा रह्या सेमीफाइनल मुकाबला मांय आज ऑस्ट्रेलिया भारत सामी जीतण सारु 265 रन बणावण री चुनौती पेश कीनी है। ऑस्ट्रेलिया री टीम 49 ओवर अर 3 गेंद खेल र 264 रन बणा र आउट व्हे ग्यी। कप्तान स्टीव स्मिथ सब ऊं बत्ता 73 रन बणायो। एलेक्स कैरी ई 61 रन बणा र रन आउट व्हे। भारत री ओर ऊं मोहम्मद शमी सब ऊं बत्ता 3 विकेट लीना। वरुण चक्रवर्ती अर रविंद्र जडेजा 2-2 अर हार्दिक पांड्या अर अक्ष पटेल 1-1 बल्लेबाज ने आउट कीना। जवाब मांय आखिरी समाचार मिलण तांई भारत 4 ओवर 5 गेंद रा खेल मांय 30 रन बणा लीना हा अर वां रो 1 बल्लेबाज आउट व्हे ग्यो हो। इण ऊं पैली ऑस्ट्रेलिया टॉस जीत र पैली बल्लेबाजी करण रो फैसलो कीनो।

000

राज्य मांय पारा रा उतार-चढ़ाव रो दौर चाल रह्यो है। संवारे अर सिंज्या री पोर हाल ई हल्की ठण्ड रो अहसास व्हे रह्यो है। दिन री बगत तापमान मांय हल्की बधोतरी दर्ज करीजी है। मौसम विभाग रे मुजब घणखर ठोड़ां दिन री बगत तापमान 30 ऊं 33 डिग्री सेल्सियस बीचे नापी ज्यो, जदके रात रो तापमान 11 ऊं 18 डिग्री सेल्सियस बीचे चाल रह्यो है।

000

आज विश्व मोटापा दिवस मनायो जा रह्यो है। चिंता रो सबब बण रह्या मोटापा रा नुकसाण रा बारा मांय जाग जगावण रा मकसद ऊं ओ दिन मनायो जावे है। प्रधानमंत्री नरेन्द्र मोदी ई आकाशवाणी ऊं प्रसारित करी ज्या खास कार्यक्रम मन की बात मांय लोगां ने स्वस्थ जीवनशैली अपनावण री सीख दीनी ही। वे खान-पान अर दिनचर्या मांय बदलाव करण सागे खाण-पीण मांय तेल कम काम लेवण री अपील कीनी ही।

000